



69.

DEO OPTIMO MAX.
UNI ET TRINO,
VIRGINI DEIPARÆ, ET S. LUCÆ,
Orthodoxorum Medicorum Patrono.



QUÆSTIO MEDICA,

CARDINALITIIS DISPUTATIONIBUS
*manè discutienda, in Scholis Medicorum, die Jovis,
trigesimâ-primâ Martii, 1729.*

M. JOANNE BAPTISTA DODART,
Regi à sanctioribus Consiliis, Archiatrorum
Comite, Doctore Medico, Præsidente.

An redeunte Vere citò redeat Convalescenti sanitas?

I.



RÆCIPITI cursu labuntur tempora; rapido
solis motu metiuntur & dies & horæ: hujus exacto
celeriter orbe revolvitur annus. Sed hic dum fu-
gam properat, unus non est illius tenor. Sol ere-
nim à quo dimanant vitæ flumina, easdem ter-
ræ regiones benigno non semper recreat aspectu:
hinc pro variis anni temporibus variæ apparent universi facies
tempestatum nomine designatæ. Ast harum cœli mutationum im-

patiens non est viventium genus, diversas quoque subit vicissitudines, diversis afficitur modis. Æstas fervida cuncta corripit, a ret ager, sitientes moriuntur herbæ. Tum in scenam prodit Autumnus insalubris, qui humiditate & inconstantia ferox, quas ingenti cum apparatu è gremio deprompterat & ostentaverat opes natura, abripit & dilacerat. Mox aspera regnat Hyems; rigent arva, penetrabile frigus adurit plantas, nullæ aut herbæ campis apparent aut frondes arboribus, latet informis humus aggeribus niveis & alto gelu sepulta. Tandem solvitur acris Hyems gratâ vice Veris & favoni, nec prata canis albicant pruinis. Jam redeunt grata Veris tempora. Sol tepenti lumine rigentes refocillat terras, convalescit natura, exhilaratur, repuerascit.

II.

VERE novo qui modo lugebat, nunc rider universus orbis: Quæ gelu indurata squallebant terræ, nunc lætis distinguntur coloribus. Non alios primâ crescentis origine mundi illuxisse dies, aliumque habuisse tenorem credideris . . . mundi natalia festivis diebus naturam celebrare diceres. Luxuriat omne vegetabilium genus. Exultant omnes animalium familiæ. Vere alma Venus colitur, Venerem genus omne volantum sentit . . . Veretument terræ, genitalia semina poscunt. Tum Pater omnipotens sæcundis imbribus, æther, conjugis in gremium latæ descendit & omnes, magnus alit magno commixtus corpore fruges. Avia tum resonant avibus virgulta canoris. Parturit almus ager zephirique tepentibus auris laxant arva sinus . . . inque novos soles audent se gramina tutò credere, nec metuit surgentes pampinus austros, sed trudit gemmas, sed frondes explicat omnes . . . & lentæ texunt umbracula vires . . . Vere novo lætis pubescunt floribus arva . . . floret odoratis terra benigna rosis . . . tunc omnis ager, tunc omnis parturit arbos. Tunc frondent silvæ, tunc formosissimus annus.

III.

NON minori cum imperio in hominum corpora dominantur tempestatum vices: suos quoque patiuntur affectus. Delicatiorem illorum fabricam inclementis cœli viribus resistere parem ne credas. Æstate igneus calor urit præcordia & artus depascitur, fibrarum remittitur tonus, perit sua fluidis consistentia, subtilis nimium rariorque sanguis vetitos & devios lymphæ canales errando subit & longius progredi impotens stagnat, cor-

rumpitur; sic grassantur inflammatio, gangræna, sphacelus. Nimio æstu evolvuntur humorum principia, acredinem concipiunt, vasa corrodunt & irritant; hinc febrium putridarum terris incubat cohors. Humidâ Autumni temperie madefactæ resolvuntur fibræ, Humore jam satis imbutus aër humidus corporis halitus agrè & invitus excipit. Hinc præpeditâ perspiratione effetisque fibrarum viribus vitalis languet motus, tabis, hydropis, melancholiæ infelix prodromus. Exhalanda materies modò hærens in vasis diopartes excruciat rheumatismo: modò quâ data porta ruens vergit ad intestina dysenteriam, diarrhœas excitatura. Adest Hyems: figure rigescunt fibræ, condensantur humores, præcluduntur cutis spiracula. Quid inde? furit tempestas periculorum plenissima, serosa aggeritur colluvies, quæ intra vasa coercita sævit. Coryzâ & gravedine nares, fauces raucedine corripit, bronchiorum glandulas infarciendo pulmones tussi fatigat, ipsius halitibus præcludendo vias aut dolosam invehit peripneumoniæ notham, aut pulmonarem phthisim clam serpentem suscitât, articulos torquet doloribus. Jam verò quis te tantis agitarum procellis excipiet portus? certam ex Veris reditu salutem expecta, nec spem Convalescentis decipiet dudum cognita erga omnem naturam Veris benignitas & clementia.

I V.

ERGO-NE dum redeunte Vere omnis reviviscit natura, solus homo frigesceret? Eò-ne devenerit gentis humanæ calamitas, ut dum aliarum tempestatum injuriis, gravissimis mulctatur affectibus, illius tempestatibus quæ omnium benignissima est, non recrearetur adventu? levia quæ convalescentem stipant symptomata, renascentis Veris faciliè parebunt imperio capefcentque fugam. Convalescentem exercent fastidiosæ morborum proles languor & rædium: vires votis impares ipsum sæpè defraudant, ambulaturus procedit? Subripiunt se se corpori pedes: thalamo decumbentem somnus diu fugit; efflagitatos respuit cibos: expostulata amicorum colloquia imbelles fatigant aures: sed in tenui res est. Maeste animo, & cuncta Veri perficienda committe. Vere quem inspiras aër, non nimio infectus humore, sed benigno rore madens rigentes emollit fibras; concretos eliquat humores; frigore nec pulmonis nec cutis spiracula constringuntur: avolantes non reprimuntur particulæ nec nimio calore retinendæ dissipantur. At tepido Veris

calore humores fluxiles evadunt, non nimium rarefacti: flexiles redduntur fibræ, non resolvuntur. Referantur incernicula; vi-
get secretionum opus, inutiles noxiæque partes foras amandan-
tur; jam defæcationis sanguis spiritus animales non ut ante, vap-
pido; & efferos parcè subministrat, sed vividos, sed generosos
qui affatim & copiosè in omnes corporis partes influentes ipsas
vitali motu perfundunt, & exoptatæ sanitatis reddunt participes.

V.

NEC fatis. Id omne aut dulce aut utile quod in omnem
naturam benigna refundunt Veris tempora, in hominis
Convalescentis emolumentum cedit. Innubila cœli facies pu-
roque ridens lumine, pulsus aquilonibus lenè spirantes zephiri
Convalescentis exhilarant sensus, animumque blandè afficiunt.
Campi herbis & floribus latè gratum odorem spargentibus va-
riegati balsamicis halitibus salubriorem efficiunt aëris usum.
Convalescentem piget de die inertem domi stare: Audet patienti
se committere aëri; crastinà die citiùs exiturus tecta subit quasi
invitus; mox omnia delibatus exercitii commoda, esurit: arridet
palato cibus: juniores herbæ non grave stomacho faciscunt ne-
gotium: animalia delicatioribus suavioribusque alimentis pasta
delicatiorem & suaviorem suppeditant succum. Tum lecto com-
ponitur: ultrò somnus advolat, & altâ quiete profundit artus.
Sic suæ ipsi cîtò restituantur vires. At morbi tenaciores reliquæ
hærent corpori: ipsas quoque Ver excutiet: si torum tæbe fuerit
affectum corpus aut pars aliqua graviore labe tentata, vaccæ,
capræ, asinæ ubera Pharmacopolarum pixidibus potiora Vere
porrigunt: si crassior lentescensque sanguis aliqua infarserit vis-
cera, aquæ ab ipsâ naturâ medicatæ, quibus cum reduce Vere
redit energia, votis cumulum addent. Sed ne nos Veri nimium
blandiri putes, sui sunt & Veri morbi, sed ni speciali miasmate
inficiatur aër, plerique salubres habendi; sæpè etenim sunt na-
turæ conamina quæ nedum lædant naturam, ipsam expediunt.

Ergo redeunte Vere citò redit Convalescenti sanitas.

Proponebat Parisiis, FRANCISCUS-JOSEPHUS HUNAULD,
Armoricus, Baccalaureus Medicus, è Regiâ Scientiarum
Academiâ, A. R. S. H. 1729. à sextâ ad meridiem.